



Ni Presidente Thomas S. Monson

Ti Panagtungpal ket Mangisangbay kadagiti Parabur

Umay kadatayo ti pannakaammo iti kinapudno ken dagiti sungbat kadagiti kangrunaan a saludsodayo no managtungpaltayo kadagiti bilin ti Dios.

Ay-ayatek a kakabsatko, agya-manak ta makaduakayo ita a bigat. Kalikagumak ti pammati ken karkararagyo bayat ti panangpatganko iti daytoy a pribilehio nga agsarita kadakayo.

Iti amin a panawen, nagsapsapul dagiti lallaki ken babbai iti pannakaammo ken pannakaawat maipanggep iti daytoy a mortal a panagbiag ken ti kasasaad ken panggepda ditoy, kasta met no kasano a maaddaan iti talna ken ragsak. Kapaset ti tunggal maysa kadatayo ti kasta a panagsapsapul.

Mabalin a gun-oden ti amin a sangkatawan daytoy a pannakaammo ken pannakaawat. Naila-onda kadagiti kinapudno nga awan inggana. Iti Doktrina ken Katulagan benneg 1, bersikulo 39, mabasatayo, “Adtoy ket imutektekanyo, ti Dios ti Apo, ket ipakita ti Espiritu ti

kasuratan, ket pudno ti sinurat, ket agtalinaed ti kinapudno iti agnanayon nga awan inggana.”

Insurat ti mannaniw:

*Mapukaw man wenno madadael
ti amin a banag iti langit ken
daga,*

*Ti kinapudno, ti kadagupan ti
biag, ket maandurannanto ti
kakaruan a pasamak,
Agnanayon, saan nga agbalbaliw,
awan patinggana.¹*

Adda dagiti agsaludsod, “Sadino ti pakasarakan ti kasta a kinapudno, ken kasano a mailasintayo daytoy?” Iti maysa a paltiing a naited babaen ken ni Propeta Joseph Smith iti Kirtland, Ohio, idi Mayo ti 1833, impakdaar ti Apo:

“Kinapudno ti pannakaammo kadagiti banag a kas iti kasasaadda ita,

ken kasasaadda idi, ken kasasaadda iti masakbayan. . . .

“Nagtaud iti Dios ti Espiritu. . . .

“Ket awan ti tao nga umawat iti pakabuklan malaksid no tungtungpalenna dagiti bilinna.

“Isu a mangtungtungpal kadagiti bilin ti [Dios] umawat iti kinapudno ken silaw, agingga a maitan-ok iti kinapudno ken maammuanna amin a banag.”²

Nagloriaan a kari daytoy! “Isu a mangtungtungpal kadagiti bilin ti [Dios] umawat iti kinapudno ken silaw, agingga a maitan-ok iti kinapudno ken maammuanna amin a banag.”

Saanan a kasapulan kadatayo iti daytoy a panawen nga aduantayo iti pannakaammo, gapu ta naisublin ti pakabuklan ti ebanghelio, tapno aglayagtayo kadagiti baybay wenno agdaliasattayo kadagiti kalsada a saan pay a napagnaan tapno sapulentayo ti kinapudno. Gapu ta ti managayat a Nailangitan nga Ama ti nagplano iti dalantayo a daliasaten ket impaayna ti saan a mapagduaduaan a pangiwawanwan—a daytoy ti *panagtungpal*. Umay kadatayo ti pannakaammo iti kinapudno ken dagiti sungbat kadagiti kangrunaan a saludsodayo no managtungpaltayo kadagiti bilin ti Dios.

Masursurotayo ti panagtungpal iti unos ti panagbiagtayo. Nangrugi idi ubbingtayo pay, dagiti addaan pagrebbengan a mangaywan kadatayo ket nangitudingda kadagiti pangiwawanwan ken annuroten tapno masigurado ti talgedtayo. Nalaklaka ti panagbiag para iti amin kadatayo no naan-anay a tungpalentayo dagita nga annuroten. Nupay kasta, adu kadatayo babaen ti padas ti masursuruan

iti sirib a magun-od iti panagtungpal.

Idi dumakdakkalak, tunggal kal-gaw manipud kadagiti umuna nga aldaw ti Hulio agingga kadagiti umuna nga aldaw ti Septiembre, nagtalinaed ti pamilyak iti balaymi iti Vivian Park iti Provo Canyon iti Utah.

Maysa kadagiti kasingedan a gayyemko kadagita a nararagsak a panawen ket ni Danny Larsen, a ti pamilyana ket akinkukua pay iti maysa a balay iti Vivian Park. Inaldaw a lawlawenmi daytoy a lugar, agalakami iti ikan iti waig ken iti karayan, agkolektakami kadagiti dadakkel a bato ken dadduma pay a napapateg a banag, magnakami, agulikami, ken agragsakkami iti tunggal minuto ti tunggal oras ti inaldaw.

Maysa a bigat, inkeddengmi ken ni Danny nga agaramid iti campfire iti daya a sardam a kaduami ti amin a gagayyemmi idiy. Kasapulanmi laeng a dalusan ti lugar nga asideg iti talon a mabalin a pagtitiponanmi. Nalaylayan ken nasiit dagiti ruot iti Hunio a nagtubo iti katalalonan, isu a saan a mayannatup daytoy kadagiti panggepmi. Rinugianmi a paruten dagiti natatayag a ruot, a planplanuenmi a dalusan ti nalawa, patimbukel a paset daytoy. Nagparutkami iti amin a pigsami, ngem bassit laeng ti naparutmi kadagiti natitibker a ruot. Ammomi nga agmalmalem nga aramidenmi daytoy a trabaho, ken nabannogkamin ken awanen ti ganasmi nga agparut pay.

Ket kalpasanna dimteng ti walo-titawen a panunotko ti impagarupko a kapintasan a solusion. Kinunak ken ni Danny, “Kasapulanta laeng a puoran dagitoy a ruot. Inta laeng *puoran* ti tengnga ti karuotan!” Dagus nga immanamong, ket timmarayak a napan iti balaymi tapno mangalaak iti posporo.

Amangan ta panunoteny a palubosandakami idi nga agusar iti posporo iti edadmi a walo, kayatko nga ilawlawag a maiparit idi kadakami ken ni Danny nga agusar iti posporo no awan ti nakabantay kadakami a na taengan. Agpadakami a nadagdagullit

a naballaagan maipapan kadagiti peggad a parnuayen ti apoy. Nupay kasta, ammok no sadino ti nangidulinan ti pamilyak iti posporo, ken kasapulan a madalusanmi daya a karuotan. Diak nagpanggadua iti panunotko, timmarayak a napan iti balaymi ket nangalaak iti sumagmamano a palito ti posporo, a siniguradok nga awan ti asino man a nakakita kaniak. Nagdararasak a nangilemmeng kadagitoy iti maysa kadagiti bolsak.

Nagtarayak a nagsubli ken ni Danny, naragsakak gapu ta addan kaniak iti bolsak ti solusion ti problemami. Nalagipko a pampanunotek idi a puoran laeng ti apoy ti kayatmi a mapuoran ket kalpasanna uray no kaskasano ket agiddepto lattan a mismo ti apoy.

Inkirasko ti posporo iti maysa a bato ket pinuorak ti nagango a karuotan iti Hunio. Gimmil-ayab daytoy a kas man la napatedtedan daytoy iti gasolina. Idi damo naragsakankami ken ni Danny bayat ti panangbuybuyami kadagiti maur-uramen a ruot, ngem dagus a naamirismi a saan a basta agiddep lattan ti apoy. Nagbuentengkami idi maamirismi nga awan ti maaramidmi tapno maiddep daytoy. Rinugian nga uramen ti makadadael nga apoy dagiti atap a ruot agingga iti igid ti bantay, a pagpeggad dagiti pine tree ken ti amin a madalapus daytoy.

Kamaudiananna awanen ti pagpilianmi no di ti tumaray tapno dumawat iti tulong. Di nagbayag nagtataray ti amin a lallaki ken babai iti Vivian Park a nagsubli-subli nga iggemda dagiti nabasa a tela ti sako, a mangisapsaplit kadagiti apoy tapno maeddep dagitoy. Kalpasan ti sumagmamano nga oras, dagiti naudi a nabati pay a beggang ket naeddep. Naispal dagiti lallakayen a pine tree, kasta met dagiti pagtaengan a dumani koma dinanon ti apoy.

Nasursuromi ken ni Danny ti sumagmamano a narigat ngem napapateg a leksion iti daya nga aldaw—ti dakkal a paset daytoy ket ti kinapateg ti panagtungpal.

Adda dagiti annuroten ken paglingtegan a makatulong tapno masigurado ti pisikal a talgedtayo. Kasta met nga impaay ti Apo dagiti pangiwawan ken bilin a makatulong a mangsigurado iti naespirituan a talgedtayo tapno naballigian a makapagdalia-sattayo iti daytoy mortal a biag a masansan a napnuan iti peggad ken makapagsubli iti Nailangitan nga Amatayo iti kamaudiananna.

Sumagmamanon a siglo ti naglabas, iti maysa a kaputotan a naan-anay a nairarem iti kannawidan a panagisakripisio iti ayup, situtred nga impakdaar ni Samuel, “Ti panagtulnog naim-imbag ngem iti sakripisio, ken panangipangag ngem iti kinalukmeg dagiti karkarnero a lallaki.”³

Iti daytoy a dispensasion, impalgak ti Apo ken ni Propeta Joseph Smith a kasapulanna “ti puso ken ti natallugod a panunot; ken ti natallugod ken natulnog manganto iti nasayaat iti daga ti Zion kadagitoy maudi nga aldaw.”⁴

Naammuanen ti amin a propeta, idi ken ita, a napateg unay iti pannakaisalakantayo ti panagtungpal. Impakdaar ni Nephi, “Mapanak ket aramidek dagiti banag nga imbilin ti Apo.”⁵ Nupay sumagmamano ti kimmapuy iti pammati ken ti kinamanagtungpalda, saan a nagsukir uray iti naminsan ni Nephi a mangaramid iti imbilin ti Apo kenkuana. Adu a kaputotan ti naparaburanen kas bunga daytoy.

Ti pakasaritaan maipapan kada Abraham ken Isaac ket maysa a makaparegta nga estoria maipapan iti kinamanagtungpal. Mabalin a narigat ken nasakit para ken ni Abraham, iti panagtungpalna iti bilin ti Dios, nga ipan ti ipatpategna unay nga Isaac iti daga ti Moria tapno idatonna daytoy kas maysa a sakripisio. Mailadawantayo kadi ti panagladingit ni Abraham bayat ti ipapanna iti naituding a lugar? Awan duadua a ti nalaus a panagrigrigatna ket agpada iti bagi ken panunotna idi rineppetna ni Isaac, impaidda isuna iti altar, ken nangala iti kutsilio tapno patayenna daytoy. Addaan iti saan a mapagduaduaan a pammati ken naan-anay a panagtalekna iti Apo,

tinungpalna ti bilin ti Apo. Anian a nagngayed ti panangipakaammo, ken nangted daytoy iti naan-anay a ragsak: “Saanmo nga idisso ta imam iti ubing, ket uray ania dika aramiden kenkuana: ta ita mabigbigko a mabutingka iti Dios, yantangay dika impaidam kaniak ti anakmo, ti bugbugtong nga anakmo.”⁶

Nasubok ni Abraham, ken gapu ti kinapudno ken kinamanagtungpalna inted kenkuana ti Apo daytoy nagloriaan a kari: “Iti putotmo mabendisio nanto isu amin dagiti nasnasion; gapu ta tinungpalmo ti timekko.”⁷

Nupay saan a nakiddaw kadatayo a paneknekantayo ti panagtungpal-tayo iti kasta a nalaus ken nasakit unay a wagas, ti kinamanagtungpal ket naidawat met kadatayo amin.

Impakdaar ni Presidente Joseph F. Smith idi Oktubre 1873, “Ti panagtungpal ket umuna a linteg ti langit.”⁸

Kinuna ni Presidente Gordon B. Hinckley, “Ti kinaragsak dagiti Santo iti Ud-udina nga Aldaw, ti talna dagiti Santo iti Ud-udina nga Aldaw, ti panagdur-as dagiti Santo iti Ud-udina nga Aldaw, ti panagrang-ay dagiti Santo iti Ud-udina nga Aldaw, ken ti agnanayon a pannakaisalakan ken pannakaitan-ok dagitoy a tao ken agpannuray iti panagtungpal kadagiti balakad ti . . . Dios.”⁹

Ti panagtungpal ket maysa a gagangay a kababalin dagiti propeta; daytoy ti nangted kadakuada iti pigsa ken pannakaammo iti amin a panawen. Napateg unay daytoy tapno maamiristayo a maikaritayo met iti daytoy a pagtaudan ti pigsa ken pannakaammo. Sidadaan a magun-od daytoy ti tunggal maysa kadatayo ita no agtungpal-tayo kadagiti bilin ti Dios.

Kadagiti napalabas a tawen, adu dagiti naam-ammok a tattao a nagbalin a napudno ken natulnog. Pinaraburan ken pinaregtadak. Isaritak man kadakayo ti pakasaritaan ti dua kadagitoy a tattao.

Ni Walter Krause ket maysa a napudno a miembro ti Simbaan a, kaduana ti pamiliiana, nagnaedda iti am-ammo itan nga East Germany

kalpasan ti Maikadua a Gubat ti Lubong. Iti baet dagiti rigat a napasarranna gapu iti kinaawan wayawaya iti dayta a lugar ti lubong iti dayta a panawen, impateg ken pinagserbian ni Brother Krause ti Apo. Sipupudno ken sigaganetget nga impatungpalna ti tunggal naituding nga aramiden a naited kenkuana.

Ti sabali pay a lalaki, a ni Johann Denndorfer, maysa nga umili ti Hungary, ket nagbalin a miembro iti Simbaan iti Germany ken nabuniagan idiay idi 1911 iti edad a 17. Iti saan unay a nabayag kalpasanna nagsubli isuna iti Hungary. Kalpasan ti Maikadua a Gubat ti Lubong, nagbalin isuna a balud iti nakayanakanna a pagilian, iti ciudad ti Debrecen. Naipaidam pay ti wayawaya manipud kadagiti umili ti Hungary.

Ni Brother Walter Krause, a di makaam-ammo ken ni Brother Denndorfer, ket nabilin nga agbalin a home teacherna ken mangsarungkar kenkuana a kanayon. Inawagan ni Brother Krause ti kompanionna iti home teaching ket kinunana kenkuana, “Nabilinta a mangsarungkar ken ni Brother Johann Denndorfer. Makakuyogka kadi kaniak iti daytoy a lawas a mangsarungkar kenkuana ken maited kenkuana ti mensahe ti ebanghelio?” Ket kalpasanna inayonna, “Agnanaed ni Brother Denndorfer iti Hungary.”

Sinaludsod ti nasdaaw a kompanionna, “Kaano a pumanawta?”

“Inton bigat,” insungbat ni Brother Krause.

“Kaanonto nga agawidta?” dinamag ti kompanion.

Insungbat ni Brother Krause, “Agrup makalawas—no *makasublita* la ketdi.”

Pimmanaw ti dua nga agkomanion iti home teaching tapno sarungkaranda ni Brother Denndorfer, nagluganda iti tren ken bus manipud iti amianan a daya ti lugar ti Germany a nagturong iti Debrecen, Hungary—maysa nga atiddog a panagbiahe. Awanan idi ni Brother Denndorfer kadagiti home teacher manipud pay idi

kasakbayan ti gubat. Ita, idi nakitana dagitoy a katulongan ti Apo, addaan panagyaman a naragsakan unay isuna iti idadatengda. Idi damo nagkedked a makialamano kadakuada. Ngem ketdi, napan iti siledna ket innalana manipud iti bassit nga aparador ti maysa a kahon a naglaon iti apagkapullona nga inurnongna iti adu a tawen. Intedna ti apagkapullo kadagiti home teacherna ket kinunana, “Ita natungpalkon ti obligasionko nga agbayad iti apagkapullo ket Apo. *Ita* mariknak a maikariakon a makialamano kadagiti katulongan ti Apo!” Idi agangay imbaga kaniak ni Brother Krause a dina mailadawan ti nariknana no panunotenna a daytoy napudno a kabsat a lalaki, nga awan ti ania man a kontakna iti Simbaan iti uneg ti adu a tawen, ket situtulnog ken agtultuloy nga ik-ikkatenna ti 10 a porsiento ti bassit nga urnongna a pangbayadna iti apagkapullona. Inurnongna daytoy a saanna nga ammo no kaano wenno no maaddaan pay isuna iti gundaway a mangbayad iti daytoy.

Pimmusay ni Brother Walter Krause siam a tawenen ti napalabas iti edad a 94. Nagserbi a sipupudno ken situtulnog iti unos ti biagna ken nangted inspirasion kaniak ken iti amin a nakaam-ammo kenkuana. Idi nabilin a mangaramid kadagiti pagrebbenganna, di kaano man nagduadua, di kaano man nagdayengdeng, ken di kaano man nagpambar isuna.

Kakabsatko, ti panagtungpal ket dakkal a pannubok iti daytoy a biag. “Subokentayo ida babaen daytoy,” kinuna ti Apo, “ta kitaentayo no aramidenda amin a banag nga ibilin ti Apo a Diosda.”¹⁰

Impakdaar ti Mangisalahan, “Ta amin a maaddaanto iti bendision kadagiti imak agtungpaldanto iti paglintegan a naituding iti dayta a bendision, ken dagiti annuroten a nasao, kas nairugi pay la idi sakbay ti pannakabukel ti lubong.”¹¹

Awanen ti nain-indaklan pay a pagwadan ti panagtungpal no di dayta impakita ti Mangisalakantayo. Maipapan kenkuana, napaliw ni Pablo:

“Uray pay no isu ti Anak, idi naadalna ti panagtulnog gapu kadagiti bambanag a linak-amna;

“Ket idinto a naaramid nga awan pagkuranganna, nagbalin nga isu ti akin-aramid iti agnanayon a panakaisalakan kadagiti isu amin nga agtulnog kenkuana.”¹²

Impakita ti Mangisalakakan ti napudno nga ayat ti Dios babaen ti panagbiag a perpekto, babaen ti panangdayaw iti sagrado a mision nga Isu ti akinmision. Saan a kaano man nagkuspag Isuna. Saan a kaano man nagpanakkal Isuna. Saan a kaano man nanggulib Isuna. Kanayon a napakumbaba Isuna. Kanayon a napudno Isuna. Kanayon a natulnog Isuna.

Nupay Isu ket sinulisog dayta a maestro ti allilaw, nga isu ti sairo, nupay kimmappuy ti bagina manipud iti panagayuno iti 40 nga aldaw ken 40 a rabii ken kalpasanna nagbisin, ngem idi idiaya ti sairo ken ni Jesus ti kapalaluan a gakat ti panangallilaw

ken panangsulisog, inikkannatayo iti nadiosan a pagwadan ti panagtungpal babaen ti panagkedked tapno maliklikan ti ammona nga umno.¹³

Idi naipasango Isuna iti panagsagaba iti Getsemani, a nagibturanna iti kasta a saem a “ti ling-etna ket kasla nabuslon a tedted ti dara a nagayus iti daga,”¹⁴ impagwadanna ti managtungpal nga Anak babaen ti panagkunana, “Ama, no pagayatam, yadayom kadi daytoy a kopa kaniak: nupay kasta saan koma a maaramid ti pagayatak, no di ti pagayatam.”¹⁵

Kas idi binilin ti Mangisalakakan dagiti nagkauna nga Apostolna, kasta met a bilinennatayo, “Surotennak.”¹⁶ Sitatallugodtayo kadi nga agtungpal?

Ti pannakaammo a sapsapulenta, dagiti sungbat a paggarantayo, ken ti pigsa a tartarigagayantayo ita a sumango kadagiti karit ti naribuk ken agbaliwbaliw a lubong ket matagikuatayo no sitatallugodtayo nga agtungpal kadagiti bilin ti Apo. Adaweke manen dagiti balikas ti Apo: “Isu

a mangtungtungpal kadagiti bilin ti [Dios] umawat iti kinapudno ken silaw, agingga a maitan-ok iti kinapudno ken maammuanna amin a banag.”¹⁷

Sipapakumbaba nga ikararagko a maparaburantayo koma iti nawadwad a naikari kadagiti natulnog wenno managtungpal. Iti nagan ni Jesucristo, ti Apo ken Mangisalakakan, amen.

DAGITI NAGADAWAN

1. “Oh Say, What Is Truth?” *Hymns*, no. 272.
2. Doktrina ken Katulagan 93:24, 26–28.
3. 1 Samuel 15:22.
4. Doktrina ken Katulagan 64:34.
5. 1 Nephi 3:7.
6. Genesis 22:12.
7. Genesis 22:18.
8. Joseph F. Smith, “Discourse,” *Deseret News*, Nob. 12, 1873, 644.
9. Gordon B. Hinckley, “If Ye Be Willing and Obedient,” *Ensign*, Dis. 1971, 125.
10. Abraham 3:25.
11. Doktrina ken Katulagan 132:5.
12. Hebreo 5:8–9.
13. Kitaen iti Mateo 4:1–11.
14. Lucas 22:44.
15. Lucas 22:42.
16. Juan 21:22.
17. Doktrina ken Katulagan 93:28.

Dagiti Pannursuro para iti Panawentayo

Dagiti adalen iti Melchizedek Priesthood ken Relief Society kadagiti maikapat a Domingo ket maisangratto iti “Dagiti Pannursuro para iti Panawentayo.” Mabalín nga isagana ti tunggal adalen manipud iti maysa wenno ad-adu pay a bitla a naited iti kallabes unay a sapa-sapa a komperensia (kitaen iti tsart iti baba). Mabalín dagiti stake ken district president ti pumili no ania kadagiti bitla ti nasken a mausar, wenno mabalinda nga idutok daytoy a pagreb-bengan kadagiti bishop wenno branch president. Nasken a yunay-unay dagiti dadaulo ti kinapateg dagiti kakabsat iti Melchizedek Priesthood ken kakabsat iti Relief Society a mangad-adal kadagiti isu met la a bitla kadagiti isu met la a Domingo.

Dagiti dumardar-ay kadagiti adalen iti maikapat a Domingo ket maallukoy nga agadal ken mangitugot iti klase ti kaudian nga isyu ti magasin iti sapa-sapa a komperensia.

Dagiti Singasing para iti Panangisagana iti Adalen manipud kadagiti Bitla

Agkararagka tapno kaduaenaka ti Espiritu Santo kabayatan ti panagadal ken panangisurrom (kadagiti) bitla. Mabalín a masulisogka a mangisagana iti adalen

nga usarem dagiti dadduma pay a material, ngem dagiti bitla iti komperensia ti naanamongan a kurikulum. Ti naituding nga aramidem ket mangtulong kadagiti dadduma nga agsursuro ken agtungpal iti ebanghelio kas naisuro iti kallabes unay a sapa-sapa a komperensia ti Simbaan.

Subliem nga adalen (dagiti) bitla, a sapulem dagiti pagbatayan ken doktrina a mangipaay kadagiti kasapulan dagiti miembro ti klase. Kasta met a sapulem dagiti estoria, reperensia ti nasantuan a kasuratan, ken palawag manipud (kadagiti) bitla a makatulongto kenka a mangisuro kadagitoy a kinapudno.

Agaramidka iti maysa a balabala [outline] no kasano ti panangisurrom kadagitoy a pagbatayan ken doktrina. Ibilangmo ti panangiraman kadagiti saludsod a mangtulong kadagiti miembro ti klase:

- Mangsapul kadagiti pagbatayan ken doktrina [kadagiti] bitla.
- Panunoten ti maipapan iti kaipapananda.
- Mangiburay iti pannakaawat, kadagiti kapanunotan, padas, ken pammaneknek.
- Mangyaplikar kadagitoy a pagbatayan ken doktrina iti panagbiagda.

DAGITI BULAN DAGITI ADALEN NGA ISURO	DAGITI MATERIAL NGA ADALEN ITI MAIKAPATA-DOMINGO
Abril 2013–Oktubre 2013	Dagiti bitla a naited iti Abril 2013 sapa-sapa a komperensia *
Oktubre 2013–Abril 2014	Dagiti bitla a naited iti Oktubre 2013 sapa-sapa a komperensia *

** Para kadagiti adalen iti maikapat a Domingo iti Abril ken Oktubre, mabalín a mapili (dagiti) bitla manipud kadagiti kallabes a komperensia wenno manipud iti kaudian. Sidadaan a magun-od dagitoy a bitla iti adu a lengguahe iti conference.lds.org.*



Ni Presidente Henry B. Eyring

Umuna a Mammagbaga iti Umuna a Pangulu

“Umaykayo Kaniak”

Babaen kadagiti balikas ken pagwadanna, impakita ni Cristo kadayo no kasano nga ad-adda nga umasidegtayo Kenkuana.

Agyamanak a makaduakayo iti daytoy a komperensia ti Ti Simbaan ni Jesucristo dagiti Santo iti Ud-udina nga Aldaw. Daytoy ti Simbaanna. Awatentayo ti naganna no sumrektayo iti pagarianna. Isu ti Dios, ti Namarsua, ken awan pagkuranganna. Mortaltayo a makapadas iti ipapatay ken panagbasol. Ngem gapu iti panagayatna kadayo ken kadagiti pamiliatayo, awisennatayo nga umasideg Kenkuana. Dagitoy dagiti balikasna: “Umasidegkayo kaniak ket umasidegaktok kadakayo; sapulendak a sireregta ket masapulandakto; agdawatkayo, ket umawatkayonto; agtuktokkayo ket malukatankayto.”¹

Iti daytoy a panawen ti Paskua ti Panagungar napalagipantayo maipanggep no apay nga ay-ayatentayo Isuna ken maipanggep iti karina kadagiti napudno a disipulona nga aramidenna ida nga ipatpategna a gagayem. Inaramid ti Mangisalakana dayta a kari ken imbagana kadayo no kasano nga umasideg Isuna kadayo no agserberbitayo Kenkuana. Maysa a pagarigan ti maysa a paltiing ken ni Oliver Cowdery idi nagserberbi isuna iti Apo a kaduana ni Propeta Joseph Smith iti

pannakaipatarus ti Libro ni Mormon: “Adtoy, sika ni Oliver, ket nagsaoak kenka gapu iti tarigagaymo; ngarud italimengmo dagitoy a balikas iti pusom. Agtalinaedka a napudno ken naregget iti panagtungpalmo kadagiti bilin ti Dios, ket yarakupko kenka dagiti takiag ti ayatko.”²

Napadasak ti rag-o ti panagbalin a naas-asideg iti Mangisalakana ken ti panagbalinna a naas-asideg kaniak a kanayon babaen dagiti simple a panagtungpal kadagiti bilin.

Naaddankayon kadagiti kasta a padas. Mabalina a naaramid daytoy idi piniliyo ti dumar-ay iti miting ti sakramento. Napadasak daytoy iti aldaw ti Sabbath idi ubingak pay. Kadagidiay a panawen inangaymi ti sakramento iti pangrabii a miting. Ti lagip ti maysa nga aldaw 65 a tawen ti napalabasen, idi tinungpalko ti bilin a mangtipon iti pamiliak ken dagiti Santo, ket mangyas-asideg pay laeng kaniak iti Mangisalakana.

Nasipngget ket nalam-ek iti ruar. Malagipko a kasla nalawag ken nabara iti uneg ti kapilia iti dayta a rabii a kaduak dagiti nagannak kaniak. Nakiranudkami iti sakramento, nga inannong

dagiti Aaronic Priesthood holder, a nakitulag iti Nailangitan nga Amami a kanayon a manglaglagip iti Anakna ken agtungpal kadagiti bilinna.

Iti gibus ti miting kinantami ti himno nga “Abide with Me; ’Tis Eventide,” nga addaan kadagiti balikas ti “O Savior, stay this night with me.”³

Nariknak ti ayat ken ti kinaasidegko iti Mangisalakana iti dayta a rabii. Ken nariknak ti liwliwa ti Espiritu Santo.

Kayatko a sadiwaen manen ti nariknak nga ayat ti Mangisalakana ken ti kinaasidegko Kenkuana kabayatan ti miting ti sakramento idi agtutuboak pay. Isu nga itay kallabes tinungpalko ti sabali pay a bilin. Nagsukisokak kadagiti nasantuan a kasuratan. Kadagitoy, ammok a maiparikna manen kaniak ti Espiritu Santo ti narikna ti dua a disipulo ti nagungar nga Apo idi inawatna ti awisda a sumrek iti pagtaenganda ken agtalinaed kadakuada.

Binasak maipapan ti maikatlo nga aldaw kalpaskan ti Pannakailansana iti krus ken itatanemna. Nasarakan dagiti napudno a babai ken dadduma pay ti naipatulid a bato a nangkalub iti tanem ket nakitada nga awanen ti bagina sadiay. Gapu iti ayatda Kenkuana, napanda idiy tapno sapsapuanda ti bagina iti bangbanglo.

Dinamag ti dua nga anghel nga adda idiy no apay a mabutengda, a kunkunana:

“Apay apay sapulenyoy kadagiti natay ti sibibag?”

“Awan ditoy, no di ket nagungaren: laglagipenyoy ti insaona kadakayo idi adda pay laeng idiy Galilea,

“A kunkunana, Masapul a ti Anak ti tao mayawat kadagiti ima dagiti tao, a managbasol, ken mailansa iti krus, ken agungar iti maikatlo nga aldaw.”⁴

Inayon ti Ebanghelio ni Marcos ti pangiturong manipud iti maysa kadagiti anghel: “Ngem inkayo, ibagayo kadagiti adalanna ken ni Pedro a mapan iti masanguananyo idia Galilea: isu makitayonto idia, kas imbagana kadakayo.”⁵

Nagguummong dagiti Apostol ken disipulo iti Jerusalem. Nalabit a kas met kadayo, nagbuteng ken nasdaawda bayat ti panagsasaritada maipapan iti no ania ti kaipapanan kadakuada ti patay ken ti damag maipapan iti panagungarna.

Dua kadagiti disipulo ti nagna iti dayta a malem manipud iti Jerusalem iti dalan nga agturong iti Emaus. Nagparang ti nagungar a Cristo iti dalan ket nakipagna kadakuada. Napan kadakuada ti Apo.

Ti libro ni Lucas ti mangipalubos kadayo a makipagna kadakuada:

“Ket naaramid, nga idi agsasaoda ken agsisinnaludsodda, ni Jesus met laeng immasideg, ket nakikuyog kadakuada.

“Ngem dagiti matada nakullaa-panda, tapno isu dida mailasin.

“Ket kinunana kadakuada, Ania a sarsarita dagitoy a sasawenyo iti maysa ken maysa iti panpannagnayo? Ket nagsardengda a silliliday.

“Ket simmungbat ti maysa a managan Cleofas, ket kinunana kenkuana, Siksika laeng ti sangsangaili idia Jerusalem, a dika ammo dagiti banag a naaramid sadiay kadagitoy nga aldaw?”⁶

Imbagada Kenkuana ti panagladindingitda iti ipapatay ni Jesus idinto a ninamnamada nga Isunto ti agbalin a Mannubbot ti Israel.

Awan duadua nga adda panangisakit ti timek ti nangungar nga Apo bayat ti pannakisaona kadagitoy dua a malidldayan ken agladladingit a disipulo:

“Ket kinunana kadakuada, O naku-neng a tattao ken naladaw ti panagpuspusoyo a mamati kadagiti amin a sinao dagiti mammadto:

“Saan aya a manipud idi a ni Cristo lak-amenna dagitoy a banag, ken sumrek iti gloriana?

“Ket idinto a rugianna manipud ken Moises ken dagiti isu amin a mammadto, impalawagna kadakuada dagiti amin a sursurat a mangsarita iti maipapan kenkuana.”⁷

Kalpasanna dimteng ti kanito a nangparagsak iti pusok manipud pay idi ubingak:

“Ket immasidegda iti purok a papananda: ket isu impakitana a kasla mapan iti ad-adayo.

“Ngem isuda inggawidda a kinunada, Agbatika kadakami: ta rumabiin ket lumabes ti horasen. Ket isu simrek a nagbati kadakuada.”⁸

Inawat ti Mangisalakan dayta a rabii ti awis a sumrek iti balay dagiti disipulona iti asideg ti purok ti Emaus.

Nakilanglang a nangan kadakuada. Nangala iti tinapay, binendisionanna, pinisina, ket intedna daytoy kadakuada. Naluktan dagiti matada tapno maam-ammoda Isuna. Kalpasanna nagawan Isuna iti imatangda. Insurat ni Lucas para kadayo dagiti rikna dagita a nagasat a disipulo: “Ket kinunada iti maysa ken maysa, Saan aya a rumayrayray ti pusota iti unegta, itay madama nga agsasao iti dalan ket itay ilawlawagna kadata dagiti sursurat?”⁹

Iti dayta met la nga oras, nagdardaras ti dua a disipulo a nagsubli iti Jerusalem tapno ipakaammoda iti sangapulok-ket-maysa nga Apostol no ania ti napasamak kadakuada. Iti dayta a kanito nagpakita manen ti Mangisalakan kadakuada.

Imbagana manen dagiti padto maipapan iti misionna a mangsubbot kadagiti basbasol ti amin nga annak ti Amana ken tapno warwarena dagiti pamungo ni patay.

“Ket kinunana kadakuada, Kasta ti adda a naisurat ken masapul a ti Cristo agsagaba, ken agungar kadagiti natay iti maikatlo nga aldaw:

“Ket maikaskasaba ti naganna ti panagbabawi ken ti pannakasubbot dagiti basbasol kadagiti isu amin a nasnasion, a nangrugi iti Jerusalem.

“Ket dakayo ti makasaksi kadagitoy a banag.”¹⁰

Maitutop met dagiti balikas ti Mangisalakan kadayo kas kadagiti

disipulona idi. Datayo ti saksi kadagitoy a banag. Ken ti nagloriaan a bilin nga inawattayo idi nabuniagantayo iti Ti Simbaan ni Jesucristo dagiti Santo iti Ud-udina nga Aldaw ket inlawlawag ni propeta Alma adun a siglo ti naglabas kadagiti danum ti Mormon:

“Ket napasamak a kinunana kadakuada: Adtoy addagitoy dagiti danum ti Mormon (gapu ta kastoy ti pannakaawagda) ket ita, gapu iti tarigagayyo nga umay iti salinong ti Dios, ken maawagan a tattaona, ken siaayat a makipagbaklay iti imet ti tunggal maysa, tapno lumag-anda;

“Wen, ken siaayat a makipagladingit kadagiti agladladingit; wen, ken manglinglingay kadagiti makasapul iti pannakalinglingay, ken agtakder a saksi ti Dios iti amin a kanito ken iti amin a banag, ken iti amin a lugar a yanyo, uray pay agingga ken patay, tapno masubbotnakayo ti Dios, ket maibilangkayonto kadagiti adda iti umuna a panagungar, tapno maadda-ankayo iti agnanayon a biag—

“Ita kunak kadakayo, No daytoy ti tarigagay ti puspusoyo, ania ti pamkuatanyo a di agpabuniag iti nagan ti Apo, a kas saksina iti pannakitulagyo kenkuana, nga agpaaykayo kenkuana ken salimetmetanyo dagiti bilinna, tapno nabusbuslon ti panangiburayna iti Espirituna kadakayo?

“Ket ita idi nangngeg dagiti tao dagitoy a balikas, nagsisipatda gapu iti rag-o, ket kinunada: Daytoy ti tarigagay ti puspusomi.”¹¹

Nakitulagtayo a tulongantayo dagiti agkasapulan ken agbalintayo a saksi ti Mangisalakan agingga a sibibiagtayo.

Kabaelantayto laeng nga aramiden daytoy a di mangliway no ay-ayatentayo ti Mangisalakan ken mariknatayo nga ay-ayatennatayo. No napudnotayo kadagiti kari nga inaramidtayto, mariknatayo ti ayattayo para Kenkuana. Manayonantoy daytoy gapu ta mariknatayto ti bilegna ken ti yaasidegna kadayo no agserbitayo Kenkuana.

Masansan nga impalagip kadayo ni Presidente Thomas S. Monson

maipapan iti kari ti Apo kadagiti napudno a disipulona: “Ket asino man a mangawat kadakayo, addaakto met sadiay, ta addaakto iti sangoyo. Addaakto iti makanawanyo ken iti makanigidyo, ket addanto ti Espirituk iti puspusoyo, ket likmutendakayonto dagiti anghelko, a mangtarabay kadakayo.”¹²

Adda sabali pay a wagas a nariknatayo nga umas-asideg Isuna kadayo. No napudnotayo nga agserbi Kenkuana, ad-adda nga umasideg Isuna kadagiti ipatpategtayo iti pamiliatayo. Tunggal maawaganak nga agserbi iti Apo iti adayo a lugar wenno kasapulan a panawak ti pamiliak, makitkitak a parparaburan ti Apo ti asawak ken dagiti annakko. Insaganana dagiti managayat a katulonganna ken mangmangted kadagiti gundaway tapno ad-adda a mayasideg ti pamiliak Kenkuana.

Nariknayo metten dayta a bendision iti biagyo. Adu kadakayo ti addaan kadagiti ipatpateg iti biag nga umad-adayo iti dalan nga agturong iti agnanayon a biag. Pampanunotenyono no ania pay ti maaramidyo tapno mapasubliyo ida. Makanamnakayo nga ad-adda a mayasideg ti Apo kadakuada no agserbikayo Kenkuana a sipapammati.

Laglagipenyoy ti kari ti Apo kada Joseph Smith and Sidney Rigdon idi nayadayoda kadagiti pamiliada iti panagserbida Kenkuana: “Gagayyemko a Sidney ken Joseph, naimbag dagiti kaamaanyo; addada kadagiti imak, ket tulongak ida no namnamaek a nasayaat; ta adda kaniak ti amin a bileg.”¹³

Kas kada Alma ken Ari Mosiah, sumagmamano a napudno a nagannak ti napaut a nagserbi iti Apo ngem adanda kadagiti annak a nayaw-awan iti dalanda iti baet ti panagsakripisio dagiti nagannak kadakuada para iti Apo. Inaramidda ti amin a kabaelanda ngem awan ti napasamak, uray no timmulong dagiti managayat ken napupudno a gagayyem.

Inkararagan idi ni Alma ken dagiti Santo ti anakna a lalaki ken dagiti annak a lallaki ni Ari Mosiah.

Dimteng ti maysa nga anghel. Dagiti kararagyo ken dagiti kararag dagiti addaan iti pammati ti mangisangbayto kadagiti katulongan ti Apo a mangtulong kadagiti miembro ti pamiliayo. Tulongandanto ida a pumili iti dalan nga agsubli iti taeng ti Dios, uray no sulsulisogen ida ni Satanas ken dagiti pasurotna, a ti panggepna ket mangdadael kadagiti familia ditoy a biag ken iti kinaagnanayon.

Laglagipenyoy dagiti balikas nga insao ti anghel ken ni Alma nga Ububing ken kadagiti annak a lallaki ni Mosiah iti panagalsada: “Ket manen, kinuna ti anghel: Adtoy, nanggep ti Apo ti kararag dagiti taona, kasta met ti kararag ti katulonganna, ni Alma, nga isu ti amam; ta nagkararag a napnuan iti pammati maipanggep kenka ta maidanon koma kenka ti pannakaammo iti pudno; ngarud, daytoy ti gapu nga immayak tapno allukoyenka iti bileg ken turay ti Dios, tapno masungbatan ti karkararag dagiti katulonganna a maibatay iti pammatida.”¹⁴

Dakayo nga agkarkararag ken agserberbi iti Apo diak maikari kadakayo a magun-odyonto ti tunggal parabur a mabalina tarigagayanyo para kadakayo ken iti pamiliayo. Ngem maikarik kadakayo nga adadanto nga umasideg ti Mangisalakana kadakayo ket paraburannakayto ken ti pamiliayo iti ammona a kasayaatan para kadakayo. Magin-awaankayto iti ayatna ket mariknayo ti dawdawatenyo a yaasidegna no tumultulongkayo iti panagserbi kadagiti dadduma. No tumultulongkayo kadagiti agkasapulan ken mangidiaya iti pangpatarnaw ti Pannubotna kadagiti agladladingit iti basol, papigsaennakayto ti bileg ti Apo. Nakaunnat dagiti takiagna tapno makaduanakayo iti panangtulong ken panagbendisionyo kadagiti annak ti Nailangitan nga Amayo, agraman kadagiti miembro ti pamiliayo.

Adda nadayag a panangsabat a naisagana para iti panagawiddayo. Kalpasanna makitatayto ti panakaipatungpal ti kari ti Apo nga

inayattayo. Isu ti umawat kadayo nga agturong iti agnanayon a biag a kadenna Isuna ken ti Nailangitan nga Amatayo. Inladawan ni Jesucristo daytoy iti kastoy:

“Ikalikagummo a yeg ken ipasdek ti pagsayaatan ti Zionko. Tungpalem dagiti bilinko iti amin a banag.

“Ket no tungpalem dagiti bilinko ken agibturka agingga iti panungpalaan maaddaanka iti agnanayon a biag, a sagut a kapatgan iti amin a sagut ti Dios.”¹⁵

“Ta isuda nga agbiag tawidendanto ti daga, ket isuda a matay aginanadanto iti amin a trabahoda, ket sumarunonto kadakuada ti bunga dagiti aramid; ket umawatdanto iti korona kadagiti mansion ti Amak, nga insaganak a para kadakuada.”¹⁶

Paneknekak a babaen ti Espiritu masurottayo ti awis ti Nailangitan nga Ama: “Daytoy ti Ay-ayatek nga Anakko. Dumngegka Kenkuana!”¹⁷

Babaen kadagiti balikas ken pagwadanna, impakita ni Cristo kadayo no kasano nga umas-asidegtayo Kenkuana. Tunggal anak ti Nailangitan nga Ama a nangpili a sumrek iti ridaw ti panagbuniag iti Simbaanna ket maaddaanto iti gundaway ditoy a biag a masuruan iti ebangheliona ken manggegan kadagiti naawagan a katulonganna ti awisna, “Umaykayo kaniak.”¹⁸

Tunggal nakitulag a katulonganna iti uneg ti pagarianna iti daga ken iti lubong ti espiritu ket umawatto iti pannarabayna babaen ti Espiritu bayat ti panangbendision ken panagserbida kadagiti dadduma para Kenkuana. Ket mariknadanto ti ayatna ken masarakandanto ti rag-o iti panagbalin nga as-asideg Kenkuana.

Maysaak a saksi ti Panangungar ti Apo a kasla addaak idiyay iti dayta a rabii a kaduak ti dua a disipulo iti balay iti dalan ti Emaus. Ammok a sibibiag Isuna kas iti ammo ni Joseph Smith idi nakitana ti Ama ken ti Anak iti lawag ti naraniag nga agsapa iti kakaywan iti Palmyra.

Daytoy ti pudno a Simbaan ni Jesucristo. Kadagiti laeng tulbek ti

priesthood nga ik-ikutan ni Presidente Thomas S. Monson nga adda bileg a mailantip kadagiti pamilia tapno agnanayon nga agbiag a kadennatayo ti Nailangitaan nga Amatayo ken ni Jesucristo. Iti Aldaw ti Panangukom agtakdertayonto iti sanguanan ti Mangisalakan. Daytoyto ti panawen ti rag-o kadagiti immasideg Kenkuana babaen ti panagserbida Kenkuana ditoy a biag. Rag-onto a mangngegan dagiti balikas: “Naimbag, adipen a nalaing ken mapagtalkan.”¹⁹ Daytoy ti pammaneknekkong kas maysa a saksi ti nagungar a Mangisalakan ken Mannubbottayo iti nagan ni Jesucristo, amen.

DAGITI NAGADAWAN

1. Doktrina ken Katulagan 88:63.
2. Doktrina ken Katulagan 6:20.
3. “Abide with Me; ’Tis Eventide,” *Hymns*, no. 165.
4. Lucas 24:5–7.
5. Marcos 16:7.
6. Lucas 24:15–18.
7. Lucas 24:25–27.
8. Lucas 24:28–29.
9. Lucas 24:32.
10. Lucas 24:46–48.
11. Mosiah 18:8–11.
12. Doktrina ken Katulagan 84:88.
13. Doktrina ken Katulagan 100:1.
14. Mosiah 27:14.
15. Doktrina ken Katulagan 14:6–7.
16. Doktrina ken Katulagan 59:2.
17. Joseph Smith—Pakasaritaan 1:17.
18. Mateo 11:28.
19. Mateo 25:21.